



N°5741  
Reçue le 11.02.2022  
Déclarée recevable  
Président de la Chambre des Députés  
(s.) Fernand Etgen  
Luxembourg, 11.02.2022

Monsieur Fernand Etgen  
Präsident vun der Chamber

Lëtzebuerg, den 11. Februar 2022

Här Präsident,

sou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Educatiounsminister weiderzeleeden.

Zanter der Rentrée 2021-2022 gëtt an engem Pilotprojet an 18 Lycéeën zu Lëtzebuerg d'Fach "digital sciences" enseignéiert. Am Kader vun der Strategie "einfach digital" soll de Schüler op 7e d'Digitalisatioun via fënnef grouss Thematiken méi no bruecht ginn. Vun der Rentrée 2022-2023 un soll dëst Fach an all Lycée ugebueden ginn, an derniewent och eng Pilotphase op 6e lancéiert ginn.

An deem Zesummenhang wëll ech dem Här Educatiounsminister dës Froe stellen:

- Wéi fält, no engem Semester, de Bilan vun der Pilotphase vum Fach "digital sciences" aus? Gëtt un der Agenda festgehale, fir dëse Cour vun der nächster Rentrée un flächendeckend unzebidden?
- Wéi eng Lycéeën wäerten un der Pilotphase fir d'6e deelhuelen?
- An der Ëmsetzung vun dem Fach "digital sciences" gouf de Lycéeën eng gewëss Flexibilitéit zougestanen; sou konnte si zum Beispill iwwer d'Fach decidéieren, op deem seng Käschten dës nei Disziplin ugebuede gëtt. Wéi hu sech déi verschidde Lycéeën hei entscheet?
- "Digital sciences" konnt vu ganz verschiddenen Enseignanten gehale ginn, vum Sproochen- bis zum Artistikprofessor. Wéi fält hei de Bilan aus? Wëll een weider un deem Wee festhalen, oder verstärkt op beispillsweis Informatiker setzen? Wéi ginn déi interesséiert Enseignanten op dëst Fach virbereet?
- Gëtt de Cour a sengem zweete Joer adaptéiert oder tel quel un deem aus der Pilotphase festgehale?
- Via dëst neit Fach ass och eng "initiation au vocabulaire anglais" virgesi gewiescht – huet de Ministère heizou schonn e Fazit gezunn?
- Wéi eng spezifesch Kompetenzentwécklung gëtt mam Fach "digital sciences" envisagéiert?

Mat déiwem Respekt,

Francine Closener  
Deputéiert



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 5741 vun der honorabeler Deputéierte Francine Closerer**

Dat neit Fach *Digital sciences* gouf am September 2021 an 18 Lycéeën zu Lëtzebuerg agefouert. Zanterhier goufe wäertvoll Erfarunge souwuel op Schüler- a Schülerinnesäit, wéi och beim Léierpersonal gemaach. D'Reckmeldunge sinn zu engem groussen Deel ganz positiv, méi kritesch Téin ginn awer och gelauschtert a fléissen an d'Iwwerschaffe vum Fach an en vue vun der flächendeckender Aféierung bei der nächster Rentrée. Am Moment gëtt mat deem Zil e Sondage duerchgefouert, deen awer aus verständleche Grënn nach net ofgeschloss ass.

**Ad 1)**

Nom éischte Semester ass ee Sondage ënnert den Enseignantë lancéiert gi fir ze kucken, ob a wou eventuell Adaptatioune musse gemaach ginn. D'Resultater leien nach net vir. D'Agenda fir eng flächendeckend Aféierung gëtt respektéiert.

**Ad 2)**

All déi 18 Lycéeën, déi dëst Joer op de 7<sup>es</sup>-Klassen um Pilotprojet deelhuefen, wäerten och op der 6<sup>e</sup> Pilotklassen ubidden.

**Ad 3)**

D'Lycéeën hunn an dësem Punkt am Kader vun hirer Autonomie ganz ënnerschiddlech gehandelt. De genaue Bilan heivu kann eréischt nom Ofschloss vum Sondage gemaach ginn.

**Ad 4)**

Weiderhi kënnen Enseignantë souwuel aus de Sciences naturelles wéi aus de Sciences humaines dat Fach halen. Déi intresséiert Persounen kréien eng komplett Weiterbildung iwwert den IFEN ugebueden (12 Stonnen) an hunn Accès zu enger nationaler Plattform, wou si eng Hëllefstellung vum Aarbechtsgrupp kréien.

**Ad 5)**

Och dës Fro kann eréischt no der Auswärtung vum Sondage definitiv beäntwert ginn. Do, wou sech erausstellt, datt Upassungen néideg sinn, wäerten dës vum Aarbechtsgrupp virgeholl ginn.

**Ad 6)**

Och dës Fro kann eréischt no der Auswärtung vum Sondage beäntwert ginn.

## Ad 7)

Mam Fach *Digital sciences* gi Mediekompetenze gefërdert, andeems Wëssen, *Savoir-faire* a *Savoir-être* mat, duerch an iwwert Medien enseignéiert ginn. D'Schülerinnen a d'Schüler léieren, déi digital Welt, hir Outilen, hiert Netzwierk an hire Fonctionnement kennen, andeems se Liene mat hirem alldeegleche Liewe maachen.

Et gi sechs Beräicher iwwert dräi Joer thematiséiert :

- *Meng digital Welt an ech*
- *De www, säin Netzwierk an ech*
- *Do you speak Informatik ? Meng Sprooch, hir Sprooch*
- *D'Spill – analog an digital, eleng oder zesummen, ee ganze Programm*
- *De Roboter, Partner am gudden an am schlechte Sënn*
- *Eng Maschinn méi schlau wéi ech, gëtt et dat ?*

D'Kompetenzentwécklung am Fach respektéiert de Lëtzebuerger Mediekompass – Cadre de référence de l'éducation aux et par les médias – a fërdert déi fënnef opgelëschte Kompetenzberäicher (<https://www.edumedia.lu/medienkompass/medienkompass/>).

Lëtzebuerg, de 15. Mäerz 2022

De Minister fir Educatioun,  
Kanner a Jugend

(s.) Claude MEISCH